



法苑珠林卷第十九

唐上都西明寺沙門釋道世玄暉撰

千佛篇第五之七

說法部

述意

蓋聞大聖逗機影迹無方所現之處無非利益故諦分真俗事決形心憑假實而上征寄乘權而下比良由生老病死無自出之期菩提涅槃有修入之證但內典無邊應機而說故使法輪則柰國初轉僧侶則憍陳始度至於迦葉兄弟目連朋友西域之大勢東

方遍告二十八天之主一十六國之王莫不服道而
傾心養風而合掌於是他化宮裏乃弘十地耆闍山
上方會三乘善吉談無得之宗淨名顯不言之旨伏
十仙之外道制六群之比丘曾前則吐納江河掌內
則搖動山谷論劫則方石屢盡辯數則微塵可窮斯
乃三界之大師萬古之獨步吾自庸才談何以盡縱
使周公之制禮作樂孔子之述易刪詩予賜之言語
商偃之文學爰及左元放葛仙子河上公莊周之等
並驅二於方內何足道哉若我大師法人天軌模三
千法式洎流中夏益利弘深廣療三毒傳照百燈相
繼不絕胡可勝言

赴機

如華嚴經云如來出世譬如日出先照一切諸大山
王次照一切大山次照金剛寶山然後普照一切大
地然日光不作是意我當先照大山乃至後照大地
由山有高下故照有前後如來亦爾平等普救然機
有利鈍感佛前後見聞不同大小有異依彌沙塞律
云佛得道七日受解脫樂有五百乘車載石蜜外國
與生路由樹過車主兄弟二人雖謂波利創奉蜜麩
四王奉鉢佛受之已爲說三歸又更七日文鱗龍王

奉非人食後過七日斯那奉食姊妹四人受三歸依
復過七日梵王來請轉法輪又普曜經云時梵王與
六萬八千梵王眷屬來詣佛所稽首足下請轉法輪
佛受請已言我宿命在波羅奈供養六百億佛應在
此轉法輪由觀樹七日以報其恩故未說法又智度
論云佛成道已不卽說法於五十七日今檢括機緣
然後說法初七日思大乘法他第七七日用於小乘
以擬衆生又菩薩瓔珞經云當轉法輪在鹿野清明
園爲久飢虛者潤於甘露法又中本起經云世尊念
言吾昔路由梵志阿蘭迦蘭待吾有禮應往度之天

空中曰此二人已亾七日又念應度鬱頭藍弗天復
告云昨日命終又念父王昔遣五人一名拘隣二名
頰陞三名跋提四名十力迦葉五名摩訶男執侍功
勤應往度之又轉法輪經云佛在鹿野樹下時空中
有自然法輪飛來當佛前而轉佛以手撫之止吾無
始來爲名色轉今愛意盡不復流轉輪卽便住又十
二遊經云佛從四月八日至七月十五日坐樹下爲
一年二年於鹿野園中爲五人說法三年爲鬱鞞迦
葉兄弟三人說法滿千比丘四年在象頭山爲龍鬼
說法五年時度舍利目連舍利七日得上果目連十

五日得上果六年須達共祇陀爲佛立精舍有十二佛圖寺有七十二講堂有三千六百間屋有五百樓閣七年在拘耶尼園爲婆陀和菩薩等八人說般若經此經一卷八年在柳山爲屯真陀羅王弟說法九

年在穢澤中爲阿掘摩說法十年遂摩竭國爲弗沙王說法十一年在恐懼樹下爲彌勒說本起經即修行本

起十二年還父王國爲釋氏八萬四千人說法又中

本起經云世尊在摩竭提國六年將還本國王遣優陀延迎佛疑此異前未詳孰定又普曜經云有梵志名優陀王命迎佛別以十二年思得相見佛七日後

還本土又分別功德經云佛還本土足昇空行與人頭齊使父王接足而已不欲屈身又大集經云佛成道十六年知諸菩薩任持法藏卽於欲色界中間出大寶階大衆俱登中階卽上昇虛空又分別功德經云若不得說經處但稱在舍衛以佛在其國二十五

年比在諸國此住最久以其中多諸珍異人多有義祇樹精舍有神異驗衆集之時獼猴飛鳥群類數千悉來聽法寂寞無聲事竟卽去各還所止犍椎適鳴已復來集此由國多仁慈故異類影附故智度論云舍衛城有九億家三億明見佛三億信而不見三億

不見不聞佛二十五年在彼尚爾若得多信利益無窮

說益

依菩薩處胎經云爾時世尊示現奇特異像變一切菩薩盡作佛身光相具足皆共異口同音說法互相敬奉各坐七寶極妙高座初一說法純男無女第二說法純女無男第三說法純度正見人第四說法純度邪見人第五說法男女正等第六說法邪正亦等當爾之時法法成就而無吾我道果成熟諸佛常法說義神足第七八萬四千空行法門第八八萬四千無相法門第九八萬四千無願法門一一法門有無量義猶如點慧之人身有千頭頭有千舌舌有千義欲得究盡此九法門義於百千分未獲其一此是諸佛祕要之藏皆由前身宿學成就

廣明說益備在諸篇

涅槃部

述意

惟我含靈福盡法王斯逝遂使北首提河春秋八十矣應身粒碎流血何追諍決最後之疑競奉臨終之供嗚呼智炬昏冥慈雲消滅長夜諸子誠可悲矣但法身至寂畢竟無爲報化所誘隨機應俗旣曰現生

焉得無滅凡聖雖殊而莫能免是以微言背痛而方轉甘露假託右脇而還放光明此則無病之迹也及千紮既纏而示雙足金棺將闔而起合掌此示不滅之徵也故灰身示權常住顯實器月之喻其旨明乎

韜光

如智度論云須跋陀羅年一百二十夢見一切人天失其明眼裸形冥中言云日當墮地破海枯竭風散須彌夢寤已恐怖天曰此是一切智人將入涅槃非關於汝明到林中求欲見佛阿難三不許佛知遙喚前共別又菩薩處胎經云如來二月八日夜半躬襪僧伽梨鬱多羅僧安陀羅跋薩各三紮施放金棺襯身上以鉢錫杖手付阿難入金剛定碎身舍利佛從金棺出金臂問覓迦葉牛呵二人阿難答云牛呵羅漢已入涅槃佛言吾今未取滅度卽入金棺寂然不語再三出手問阿難吾爲八部說摩訶乘經汝悉聞不對曰唯佛知之又問吾在忉利爲母說法汝知不答曰不知又吾在龍宮說法龍子得道留全身舍利高一百三十丈汝知不答曰不知吾處母胎十月爲諸菩薩現不退轉法輪世尊卽以神力現母身中行住坐卧一切雲集入胎舍中汝知不答曰不知

阿難大聖

豈得不知言不知者欲推
如來化功密故答不知也

又涅槃經云善男子我於
此娑羅雙樹大師子吼者名大涅槃東方雙者破於
無常獲得於常乃至北方雙者破於不淨而得於淨
此中衆生爲雙樹故護娑羅林不令外人取其枝葉
斫截破壞我亦如是爲四法故令諸弟子護持佛法
此四雙樹四王典掌我爲四王護持我法是故於中
而般涅槃又中阿含經云如來爾時將詣雙樹四壁
鬱多羅僧以爲施坐僧伽梨爲枕右脇而卧足足相
累而般涅槃又菩薩處胎經云爾時八大國王各持
五百張白氎栴檀木蜜盡內金棺裹以五百張氎纏
裹金棺復五百乘車載香酥油以灌白氎爾時大梵
天王將諸梵衆在右面立釋提桓因將諸忉利諸天
在左面立彌勒菩薩及十方諸神通菩薩當前立爾
時世尊欲入金剛三昧碎身舍利於娑婆世界轉此
真法作是念已十方世界皆六返震動

赴哀

如摩耶經云阿那律升忉利天以告摩耶摩耶便至
棺自爲開合掌起曰遠屈來下佛語阿難汝當知爲
後不孝衆生故從金棺出問訊母也僧祇律云於天
冠塔邊闍維佛身迦葉赴佛涅槃經云於是迦葉辭

佛到伊蔭梨山中去舍衛國二萬六千里其山多出
七寶甘果種種香樹雜藥不可稱數亦有騏驎朱雀
鳳凰異學道士時有方石平正色如瑠璃縱廣百二
十里樹華五色冬夏茂盛列坐石上迦葉前後教授
一千弟子皆得羅漢常坐此石誦經行道弟子七人
同夕得夢其比丘夢見所坐方石中央分破樹皆拔
根復一比丘夢見四十里泉水皆乾竭華悉零落復
一比丘夢見拘羅邊坐皆悉傾毀復一比丘夢閣浮
利地皆悉傾陷復一比丘夢見須彌山崩復一比丘
夢見金輪王薨復一比丘夢見日月墮落天下失明
晨起各以所夢啓白迦葉迦葉告言我曹前見光明
地時大動卿等得夢佛將般泥洹耶卽勅諸弟子往
赴俱夷那國又菩薩處胎經云大迦葉至佛出雙足
迦葉說偈云

佛所教化人 所度已周遍 我行道絕向
唯恨不見佛

於是繞棺七帀阿難西北角難陀捉東北角諸天在
後直北去雙樹四十九步大迦葉手執火然香薪
又雜阿舍經云佛涅槃已雙樹生華垂下供養阿難
說偈云

五百氎纏身 悉燒令磨滅 千領細氎衣
以衣如來身 唯二領不燒 最上及襯身

諸經具明闡維之法
以文繁故畧而不錄

時節

如涅槃經云如來何故二月涅槃善男子二月名春
陽之月萬物生長是時衆生多生常想爲破衆生如
是常心說一切法悉是無常唯說如來常住不變於
六時中孟冬枯悴衆不愛樂陽春和液人所貪愛爲
破衆生世間樂故演說常樂我淨亦爾爲破世間我
淨故說如來真實我淨初生出家成道轉妙法輪皆
以八日何故涅槃獨十五日佛言善男子如十五日
月無虧盈諸佛如來亦復如是入大涅槃無有虧盈
以是義故以十五日入般涅槃又長阿含經云時有
香姓婆羅門問阿闍世王曰何等時佛生何等時成
道何等時滅度闍王答曰沸星出時生沸星出時出
家沸星出時成道沸星出時滅度何等生二足尊何
等出叢林苦何等得最上道何等入般涅槃沸星出
二足尊沸星出叢林苦沸星得最上道沸星入般涅
槃八日如來生八日佛出家八日成菩提八日取滅
度二月如來生二月佛出家二月成菩提二月取涅

槃二月生二足尊二月出叢林苦二月得最上道八月般涅槃城又薩婆多論云佛以二月八日沸星現時初成等正覺亦以二月八日沸星出時生以八月八日沸星出時轉法輪以八月八日沸星出時取般涅槃

弟子

依智度論云長老大迦葉於耆闍崛山集三藏可度衆生竟隨佛入般涅槃清朝持鉢入王舍城乞食已上耆闍崛山語諸弟子我今日入無餘涅槃一切諸人聞是語已皆大愁憂迦葉晡時從禪定起入衆中坐讚說無常苦空無我如是種種說法已從佛所得僧伽梨持衣鉢提杖如金翅鳥現昇虛空作十八變於耆闍山頭與衣鉢俱作是願言令我身不壞彌勒成佛時我是骨身還出直入山頭石中如入栗泥入已山還合後人壽八萬四千歲身長八十尺彌勒佛身長一百六十尺佛面二十四尺圓光十里是時衆生聞佛出世無量人等隨佛出家又大悲經云是迦葉以本願力所加持故住虛空中現種種神通變化已以身火闍維其身闍維身已灰炭不現又薩婆多論云舍利弗目連以不忍見佛泥洹便先泥洹以

先泥洹故七萬阿羅漢同時泥洹當於爾時四輩弟子莫不荒亂於時如來以神通力化作二大弟子在佛左右以此緣故衆生歡喜憂惱卽除佛爲說法各得利益

結集部

述意

夫真諦玄凝法性虛寂而開物導俗非言難津是以不二默訓會於義空之路一音振辯應乎羣有之境自我師能仁之出世也鹿野唱其初言金河究其後說契經以誘小學方典以勸大心妙輪區別十二惟部法聚總要八萬其門暨善逝晦迹而應真結藏始則四鈐初集經中則五部分戒大寶斯在含識至意爲存拔苦是以金言不可遺謬也

結集

此中廣明結集具有四時第一依智度金剛仙二論如來在此鐵圍山外共文殊師利及十方佛結集大乘法藏第二依菩薩處胎經及四分律等如來初入涅槃始經七日大迦葉共五百羅漢令到十方世界召得八億八千衆共爲集三藏第三依智度論如來入涅槃後至夏安居初十五日大迦葉共千羅漢在

撰述
王舍城結集三藏第四依四分律如來入涅槃後一
百年內爲跋闍子擅行十事大迦葉共七百羅漢在
毗舍離城結集三藏此下四重依經次第列出庶將
來哲不積餘卜也

大乘結集

依大智度論金剛仙論云文殊師利結集中明如來
在此世界之外不至他方世界十方諸佛並皆雲集
說法亦名話經文殊後結集召諸菩薩及大羅漢無
量無邊各言某經我從佛聞須菩提言金剛般若我
從佛聞諸經當部各有弟子同時聞者並云我親從
佛聞故知不局阿難然阿難則遍聞諸經餘之弟子
則偏局當部又依涅槃經大聖說法既有三乘傳法
人還有三名一名阿難陀此云歡喜謂持小乘法藏
二名阿難陀跋此云歡喜賢謂持中乘法藏三名阿
難陀娑伽羅此云歡喜海謂持大乘法藏三名雖異
據體唯一故維摩經云舍利弗問天女曰汝於三乘
當何志求天曰若以小乘法化我作聲聞若以中乘
法化我作緣覺若以大乘法化我作菩薩故知阿難
通持大小乘人此三人中前二人者有親聞傳聞故
千結集中阿難昇座依智度論說偈云

佛初說法時 爾時不聞見 如是展轉聞

佛遊波羅奈 爲五比丘說 四諦之法輪

五百結集

依菩薩處胎經云爾時佛取滅度已經七日七夜時
大迦葉告五百阿羅漢打犍椎集衆卿五百人盡詣
十方諸佛世界諸有得阿羅漢六通者盡集此閻浮
提雙樹間釋迦牟尼佛今已捨壽起七寶塔今集欲
得演出真性法身汝等速集聽采微妙之言爾時五
百羅漢受大迦葉教如人屈伸臂頃卽到十方恒河
沙刹土集諸羅漢得八億八千衆來集忍界聽受法
言又僧祇律云時大迦葉語諸比丘結集法藏勿令
法滅諸人欲往餘處結集迦葉言應住王舍城有五
百人卧具衆皆言爾令阿那律守佛舍利勿使諸天
將去過去迦葉佛滅度時弟子但知懊惱不覺天持
舍利去盡世人不得供養時阿難不去迦葉與千人
至刹帝山施世尊舍利目連坐次迦葉四月結集斷
於外緣少二人不滿五百那律復來猶少一人迦葉
遣目連共行弟子梨婆提長老羅漢汝往三十三天
呼提那羅漢提那羅漢聞佛涅槃不忍見佛行處已
入滅度後遣至尸利沙翅宮喚憍梵波提羅漢乃至

毗沙門天宮命須蜜多羅漢並已涅槃又菩薩處胎經云爾時迦葉見衆集已語優婆離卿爲維那唱阿難下卽受教唱下罰阿難不請佛住壽等已阿難心意荒亂內自念言佛滅度未久恥我乃爾卽自思惟四諦法已便於衆前成阿羅漢諸塵垢滅朗然大悟聖衆稱善諸天歌歎爾時大地六反震動時大迦葉卽使阿難昇七寶高座迦葉告言佛所說法一言一字汝勿使有缺漏菩薩藏者集著一處聲聞藏者集著一處戒律藏者亦集著一處爾時阿難最初出經胎化藏爲第一中陰藏第二摩訶衍方等藏第三戒律藏第四十住菩薩藏第五雜藏第六金剛藏第七佛藏第八是爲釋迦文佛經法具足無失矣爾時阿難發聲唱言我聞如是一時說佛所居處迦葉及一切聖衆皆悉墮淚悲泣不能自勝咄嗟老死如幻如化昨日見佛今日已稱言我聞又四分律云爾時世尊在拘尸城末羅國娑羅林間般涅槃諸末羅子洗佛舍利已具辦闍維時大迦葉燒舍利已以此因緣集比丘言我等今可共論法毗尼勿令外道以致餘言譏嫌沙門瞿曇法律若煙其世尊在時皆共學戒而今滅後無學戒者諸長老今科差比丘多聞智慧

是阿羅漢者時卽差得四百九十九人皆是阿羅漢
多聞智慧者時諸比丘言應差阿羅漢在數中大迦葉
言勿以阿羅漢在數中何以故阿羅漢有愛恚怖癡是故
不應令在數中時諸比丘復言阿羅漢是供養佛人常
隨佛行親從世尊受所教法必處處疑問世尊是故
今者應令在數卽便令在數諸比丘皆作是念我等
當於何處集論法毗尼多饒飲食卧具無乏耶卽皆
言唯王舍城房舍飲食卧具衆多我等今宜可共往
集彼論法毗尼時大迦葉卽作白令集王舍城時阿
難在道行靜處心自念言譬如新生犢子猶故飲乳
與五百大牛共行我今亦如是學人有作者而與五
百羅漢共行時諸長老皆往毗舍離阿羅漢在毗舍離
住時諸道俗皆來問訊阿羅漢多人衆集時有跋闍子
比丘有大神力已得天眼知他心智今觀阿羅漢爲是
有欲無欲人耶卽便觀察是有欲非是無欲今當令
其生厭離心卽說偈言

靜住空樹下

心思於涅槃

坐禪莫放逸

多說何所作

時阿羅漢聞說偈已卽便獨處精進不放逸寂然無欲
時在露地夜多經行遇明相欲出時身疲極方欲偃

卧頭未至枕頃於其中間心得無漏解脫此是阿難
未有法時阿難得阿羅漢已卽說偈言

多聞種種說 常供養世尊 已斷於生死

瞿曇今欲卧

時大迦葉集比丘僧卽作白集論法毗尼時阿難卽
從座起偏露右肩右膝著地合掌白大迦葉我親從
佛聞憶持佛語始從初篇乃至一切捷度調部毗尼
增一都集爲毗尼藏彼卽集一切長經爲長阿舍一
切中經爲中阿舍從一事至十事從十事至十一事
爲增一阿舍集於雜事爲雜阿舍如生經本經乃至
偈經等如是集爲雜藏有難無難繫相應作處集爲
阿毗曇藏時卽集爲三藏在王舍城五百阿羅漢共
集法毗尼是故言集法毗尼有五百人
千人結集

依智度論云是時佛入涅槃已大迦葉如是思惟我
云何使是三阿僧祇難得佛法令得久住應當結集
三藏可得久住未來世人可得受行作是語竟住須
彌頂搥銅捷椎說此偈言

佛諸弟子 若念於佛 當報佛恩

莫入涅槃

是捷椎音作大迦葉語聲遍至大千世界皆悉聞知
諸有弟子得神力者皆來集會大迦葉所選得千人
除其阿難盡皆羅漢內外經書諸外道家十八種大
經盡亦讀知皆能論議降伏異學大迦葉言若我昔
常乞食者常有外道強來難問廢闕法事令王舍城
常設飯食供給千人不得取多告語闍王給我等食
日日送來不得他行是中夏安居三月初十五日說
戒時集大迦葉入定已天眼觀今衆中誰有煩惱未
盡應逐出者唯有一人阿難煩惱未盡餘九百九十
九人諸漏已盡清淨無垢大迦葉從禪定起衆中手

牽阿難出言今清淨衆中結集經藏汝結未盡不應
住此是時阿難慚愧悲泣而自念言我二十五年隨
侍世尊供給左右未曾得聞如是苦惱佛實大德慈
悲含忍念已白大迦葉言我能有力久可得道但諸
佛法阿羅漢者不得供給左右使令以是留殘結使
不盡斷耳大迦葉言汝更有罪佛意不欲聽女人出
家汝慙懃勸請佛聽爲道以是佛之正法五百歲而
衰微法汝應作突吉羅懺阿難言我憐愍瞿曇彌又
三世諸佛法皆有四部衆我釋迦文佛云何獨無大
迦葉復言佛欲涅槃時近俱夷那竭城背痛四疊鬱

多羅僧敷卧語汝言我須水汝不供給是突吉羅阿
難答言是時五百乘車截流而渡令水渾濁以是之
故不取大迦葉復言正使水濁佛有大神力能令大
海濁水清淨汝何以不與是汝之罪汝去作突吉羅
懺悔大迦葉復言佛問汝若有人四神足好修可住
壽一劫若減一劫多陀阿伽度四神足好修欲住壽
一劫若減一劫汝默然不答問汝至三汝故默然汝
若答佛應住一劫若減一劫由汝故令佛世尊早入
涅槃汝作突吉羅罪懺悔阿難言魔蔽我心是故無
言我非惡心而不答佛大迦葉復言汝與佛褻僧伽
梨衣以足踏上是汝之罪汝應作突吉羅懺悔阿難
言爾時有大風起無人助我我捉衣時風吹來墮我
脚下非不恭敬故踏佛衣大迦葉復言佛陰藏相般
涅槃後以示女人是何可耻汝應作突吉羅懺悔阿
難言爾時我思惟若諸女人見佛陰藏相者便自羞
耻女人形欲得男子身修行於佛種種德根以是故
我示女人不爲無耻而故破戒大迦葉言汝有此六
種突吉羅罪盡應僧中悔過阿難言諾隨長老迦
葉及僧所教是時阿難長跪合掌偏袒右肩脫革屣
作六種突吉羅罪懺悔大迦葉於僧中手牽阿難出

語阿難言斷汝漏盡然後來入殘結未盡汝勿來也
如是語竟便自閉門爾時諸阿羅漢議言誰能結集
毗尼法藏者長老阿泥盧豆言舍利弗是第二佛有
好弟子字憍梵波提秦言柔輦和雅常處閑居住心
寂寞能知毗尼法藏今在天上尸利沙樹園中住遣
使請來大迦葉語下座比丘汝次應僧使下座比丘
歡喜踊躍受僧勅命白大迦葉言我到彼所陳說何
事大迦葉言汝到彼已語憍梵波提大迦葉等漏盡
阿羅漢皆會闍浮提僧有大法事汝可疾來是下座
比丘頭面禮僧足右遶三匝如金翅鳥飛騰虛空往
到憍梵波提所頭面作禮語憍梵波提傳前迦葉教
是時憍梵波提心覺生疑語是比丘言僧將無鬪諍
喚我耶無有破僧者不佛日滅度耶是比丘言佛已
滅度憍梵波提言佛滅度太疾世間眼滅逐佛轉法
輪將我和上舍利弗今在何所答曰先入涅槃憍梵
波提言大師法將各自別離當可奈何摩訶目捷連
子今在何所是比丘言此亦滅度憍梵波提言佛法
欲散衆生可憐大人過去如是次第問諸羅漢憍梵
波提言我失離欲大師皆已滅度我不復能下闍浮
提住此般涅槃說是言已作十八變自心出火燒身

身中出水四道流下至大迦葉所水中有聲說此偈言。

憍梵鉢提頭面禮

妙衆第一大德僧

聞佛滅度我隨去

如大象去象子隨

爾時下座比丘持衣鉢還僧是時阿難中間思惟諸法求盡殘漏其夜坐禪經行慇懃求道是阿難智慧多定力少是故不即得道定智等者乃可速得後夜欲過疲極偃息却卧就枕頭未至枕廓然得悟如電光出闇者見道入金剛定破一切煩惱山得六通已即夜到僧堂門敲門而喚大迦葉問言敲門者誰答

言我是阿難大迦葉言汝何以來阿難言我今夜得盡諸漏大迦葉言不與汝開門汝從門鑰孔中來阿難答言可爾即以神力從門鑰孔中入禮拜僧足懺悔大迦葉莫復見責大迦葉手摩阿難頭言我故爲汝使汝得道汝莫嫌恨我亦如是以汝自證譬如手畫虛空無所染著阿羅漢心亦復如是一切法中得無所著復汝本座是時僧復議言憍梵波提已取滅度更有誰能結集經藏長老阿泥盧豆言是長老阿難於佛弟子常侍近佛聞經能持佛法常讚譽是阿難能結集經藏是時長老阿迦葉摩阿難頭言佛囑

累汝令持法藏汝應報佛恩佛在何處最初說法佛
諸弟子能守護法藏者皆已滅度唯汝一人在汝今
應隨佛心憐愍衆生故集佛法藏是時阿難禮僧已
坐師子牀時大迦葉說此偈言

佛聖師子王

阿難是佛子

師子座處坐

觀衆無有佛

如是大德衆

無佛說威神

如夜無月時

虛空不明淨

諸大智人說

汝佛子當演

何處佛初說

今汝當布施

是時長老阿難一心合掌向佛涅槃處作如是言

佛初說法時

爾時我不見

如是展轉聞

佛在波羅奈

佛爲五比丘

初開甘露門

說真四諦法

苦集滅道諦

阿若憍陳如

最初得見道

及八萬諸天

聞是得見道

是千阿羅漢聞是語已上昇虛空高七多羅樹皆言

咄哉無常力大如是我等眼見佛說法今乃言我聞

便說偈言

我見佛身相

猶如紫金山

妙相衆德滅

唯有名獨存

是故當方便

求出於三界

勤集諸善法

涅槃最安樂

爾時長老阿泥盧豆說此偈言

咄世間無常 如水月芭蕉 功德滿三界
無常風所壞

爾時大迦葉復說偈言

無常力甚大 愚智貧富貴 得道及未得

一切無能免 非巧言妙寶 非欺誑力諍

如火燒萬物 無常死法爾

法苑珠林卷第十九

音釋 黠下八切 慧也 褰達協切 與纒同 裸郎果切 赤體也 褰必益切 摺

鬣達協切 毛布也 騏驎正作麒麟 渠渠珍切 鈴音合 佞倚倨也

常熟居士嚴濟施贊刻此 法苑珠林第十九卷吳江比丘明覺對 歐寧唐士登書 長洲吳子章刻 萬曆辛卯夏清涼山妙德庵識

法苑珠林卷第二十

唐上都西明寺沙門釋道世玄暉撰

千佛篇第五之八

結集部之餘

結集之餘

七百結集

四分律云爾時世尊般涅槃後百歲毗舍離跋闍子
比丘行十事言是法清淨佛所聽應兩指抄食得聚
落間得寺內後聽可得常法得和得與鹽共宿得飲
闍樓羅洒得畜不截坐具得受金銀彼於布薩日檀

越布施金銀而共分之如是簡擇一一檢校乃至十
事非法非毗尼非佛所教已皆下舍羅在毗舍離七
百何羅漢集論法毗尼故名七百集法毗尼已下文繁不可

載

依道宣律師感應記云律師問天人曰世尊涅槃後
結集法藏儀式云何天人答曰惟大聖隱顯隨機生
滅三藏遺迹結集是因眾集多少律論不等如律中
五百七百皆遵大迦葉最為眾首如大論中高選千
人皆同無學至結集已召外眾集重敘所結有不同
者分為二部依尊迦葉名上座部餘外眾多名大眾
部依文殊問經初分二部即其事也通約大小三藏
皆阿難出其住處同集王舍城然據文殊集眾略結
大乘即在大鐵圍山外二界中間今明儀式初佛滅
度經停一月供養舍利方始闍維依律停之七日即
日焚了置塔亦竟一切大眾往詣舍衛祇洹精舍尊
大迦葉使小目連同名者六人皆大神通也於僧戒壇鳴鐘集眾
時百億四天下凡聖僧等一切皆集便白四羯磨闍
賓頭盧及阿難已阿難昇高座披佛布僧伽梨先誦
遺教經如佛在世約勅之相時大菩薩阿羅漢一切
比丘天龍八部聞皆悲泣不能自勝爾時大迦葉即

從座起著布僧伽梨手執尼師壇至高座前敷坐具
禮阿難已右繞三帀而立時大梵天王持七寶蓋覆
阿難上時天帝釋進七寶案置阿難前羅睺阿修羅
王各執七寶香鑪在阿難前阿難受已置寶案上他
化天王進七寶几在寶案後時魔王波旬持七寶拂
授與阿難仍與帝釋夾侍兩邊四天王各侍高座四
脚三十二使者在迦葉後各各呈恭胡跪敬聽時大
迦葉禮阿難已又繞三帀至前問訊如佛無異然後
問緣如別所說一一依經始從如是乃至末後歡喜
奉行爾時迦葉重問曰我過去諸佛修多羅中一一
分部說汝恒至佛邊當有教勅阿難答曰我受世尊
教末世衆生煩惱垢重不能解我教法不得部類出
之汝當分別說也或十章五章隨意而安置令鈍根
者易解我法天問如來在世時教勅優波離及我大
迦葉入堂東寶樓觀古佛毗尼及不同相我欲結集
爲依古佛說爲依今世尊教耶答曰我從世尊聞以
語大迦葉若結集毗尼當分五部相往古諸佛所說
毗尼一相無二今衆生薄福故說多部我滅度後無
智愚人分我教網以爲五部十八部乃至五百部雖
味薄淡仍是我正法爾時佛告四天王汝施我碼碯

又告帝釋汝施我金銀又告魔王梵王汝施我天工
師又告修吉龍王羅睺阿脩羅等汝施明月寶珠及
摩尼珠等用爲塔燈明天龍王等各依命獻世尊受
已以其神力於一念頃諸塔皆成地爲六種震動塔
放大光從於香山直至戒壇化爲金銀臺臺至有頂
中有百億佛說諸勝妙法歎持戒功德毀破戒者佛
告阿難如前寶塔今在香山世尊涅槃時付囑帝釋
及以四天王世尊涅槃竟將往戒壇南華林外安置
九十日待迦葉結集竟最初於藁本寫出三藏教次
令阿闍世王又寫出五本用我黃金印及以白銀印
印迦葉初本及闍王寫者須用七寶印印迦葉藁本
次以七寶印印魔王寫者梵王寫三本可用白銀印
帝釋寫七本可用黃金印娑竭龍王寫八萬經本者
俱三色印總以印定之令流布閻浮提及三天下皆
用印之旣印經已還內金瓶中住戒壇南者爲迦葉
結集三藏諸教文義皆令圓備欲令阿難隨問出經
令無遺忘由此二事令鎮戒壇南迦葉入定後四王
帝釋將塔及金瓶往至香山顶經一百年帝釋四王
將諸天樂日日來供養法爲彼山中五通神仙其數
八萬次第於此閻浮洲作粟散王不信正法者爲令

生信故鎮香山復爲育王初不信我法廻彼邪見令
生正見與八萬塔又佛告目連汝往須彌山頂鳴鐘
召集十方我本分身諸佛及大千界聲聞菩薩衆等
佛放光明大地振動諸佛雲集世尊從座起與分身
佛俱共合掌禮塔觀門觀門內開彼黃金塔中有八
萬真珠白銀樓觀盛佛脩多羅及大毗尼藏諸臺觀
上有大摩尼珠以爲燈明有六比丘入滅盡定白銀
觀內多有七寶蓮華師子之座其數八百萬一一蓮
華座皆有諸佛聲聞形像及八部神衛復有五十比
丘入滅盡定佛告普賢汝持我黃金螺至比丘所吹
我興世曲并告我涅槃普賢依教吹已此比丘卽從
滅定起問普賢言今何佛出答釋迦牟尼佛今將涅
槃彼比丘卽共普賢來至佛所禮敬起居却住一面
立塔內有六比丘先白佛言拘留佛涅槃時令我住
此塔待至釋迦乃至樓至彼佛勅我言後佛興世入
涅槃時結集三藏時當開我觀取我經律一本我此
大千界百億諸國土書有六十四體各取一本將付
彼佛令滅度後結集三藏竟時當依我經本書寫莊
嚴又隨諸國所用不同得傳文字者皆可用之唯除
皮骨土書不得傳寫自外樹葉紙素金寶石鐵等並

得用之彼佛令我入定守護經像令付世尊涅槃後
迦葉結集竟流傳諸國也又佛告娑竭龍王及四天
王等汝施我真珠摩尼金銀等欲造塔觀盛前佛及
經像爾時天龍等隨念奉施如來受已卽以神力於
一食頃皆成珠臺及金銀塔觀各得八百萬盛前經
像又告分身佛汝等各施我一塔及一白銀觀鎮我
大千界所有遺法不令毀壞諸佛聞已各隨喜施又
得百億萬佛並放口光悉皆隨喜又告諸菩薩能持
守護我之臺塔傳譯經典當依臺塔經像流布此之
臺塔並在香山頂世尊涅槃時勅我及羅雲住持未
來惡世開導衆生令離衆苦將至帝釋宮安置歡喜
園乃至魔王於塔供養至五百年過五百年已後教
流行諸國迄至法滅塔亦上至兜率陀天彌勒旣見
塔來知我法滅放大光明遍照地獄後遇樓至佛皆
得解脫過是年已塔還從兜率陀天下住娑竭龍宮
世尊所造塔及白銀觀付文殊師利普賢觀音將此
觀塔周遍大千界一國留一觀及一金塔如震旦爾
時文殊將塔觀往清涼山金剛窟安置至今流行今
前菩薩從臺出經像示彼持者令易流通乃至我之
法滅令娑竭大龍收入大海宮內又問一切脩多羅

藏既結集已當安何國付囑何王今欲結集爲當廣
結略結請次第說之答曰我聞世尊說付囑大迦葉
當令廣集又付文殊往大鐵圍山諸菩薩等住處九
地有八萬人當令略集付囑阿闍世寫我遺教迦葉
結集本安置修羅窟中又問世尊在時我從佛聞若
結集竟將我三藏教付囑娑竭龍王今聞汝說與昔
聞異答曰我聞世尊說結集三藏在脩羅窟中經二
十年中待文殊結竟方付娑竭龍王又問祇桓精舍
有諸古佛及以三藏陰陽書及供養具當付何人答
曰此事因緣並在祇桓圖經說之各有付處不煩此
述又問我從佛聞滅度之後一切毗尼流布閻浮及
三天下衆生樂欲所見不同餘百億天下並令流布
我欲結集今對人天汝當答我答曰我受佛教我滅
度後汝語大迦葉及文殊師利流我毗尼此閻浮洲
三十二國是諸衆生並有大根堪可流行迦葉遺教
東弗婆提洲二百六十國西瞿耶尼洲一百三十國
並行迦葉遺教自餘天下衆生薄福不堪聞教莫行
此法如來滅後四十年中遣行二部此四天下又問
云何二部教答曰四分十誦律四十年後一百一十
年迦葉遺律方行前國如震旦諸國謂之君子國根

性輕利得行三部教合四百三國土同此一文字並行前三律教又問云何三部教答曰行前二部教乃以大僧祇如求流離國及餘二天下唯行一部教所謂薩婆多部是也祇桓寺殿內簷下有四銀臺兩臺內有黃金修多羅白玉爲牒又有兩臺內有毗尼藏黃金爲牒白銀爲字毗尼律藏是龍王書修多羅經藏是魔王書此二藏經並是過去星宿劫前古佛經也於閻浮洲中此之兩部書經最爲第一至佛涅槃後娑竭龍王收將入宮供養又迦葉佛時震旦國之一人書大毗尼藏及修多羅藏及修多羅經銀紙金山金剛窟中又有臺內有過去佛說毗尼書有三萬八千種百億四天下同此方書者最爲第一南方天王第三子張璵撰述祇桓圖經一百卷北方天王第十六子造立五精舍記有五百卷各在當天頌曰

遙欣大覺

曠矣神功

四禪無像

三達皆空 千佛異迹 一智心同

表靈降世 敷演開矇 賢劫始四

餘佛潛通 續前有七 繼嗣虔恭

永言鷲室 栖誠梵宮 八相成道

萬德虛融 天人受福 惡止善興

含生藉甚 同感恩隆

感應緣 略引十一
二靈驗

周書記佛生時

周書記佛滅時

史記記佛是大聖

前漢孝武帝已聞佛教

前漢哀帝時已行齋戒

秦始皇時亦有佛法至

後漢郊祀志記佛為大聖

後漢明帝時三寶具行

西晉海浮維衛迦葉二石像

齊文宣帝時得佛牙至

隋天台釋智顛感見三道寶階

唐潞州釋曇榮感見七佛現

夫至人應感與世推移慈化無方豈局形教致使聞

同解異說一悟殊登位地而上征封迷途而下降全身碎身之相聚塔散塔之儀神光燭而邪計摧靈迹挺而深信立自法水東流道光西照英賢榮盛感應實多故育王表塔創啓隆周釋父影形鬱興炎漢自斯歷代積著彌繁量非五天獨揚神化故經曰正法後被先於北方次及東南至中方滅也今且列漢明已來至今大國隨所見聞三寶靈迹件述三五餘之不盡者備在別傳

案周書異記云周昭王卽位二十四年甲寅歲四月八日江河泉池忽然汎漲井水溢出山川震動有五色光入貫太微遍於西方盡作青紅色太史蘇由奏曰有大聖人生於西方一千年外聲教及此昭王卽勅鐫石記之埋於南郊天祠前此卽佛生之時也相國呂侯乘驂驪八駿而行求佛因以禳之

周穆王五十三年壬申歲二月十五日平日暴風忽起損舍折木地動天陰西方白虹十二道太史扈多曰西方聖人滅矣此卽佛入涅槃之相也

又案春秋魯莊公七年夏四月恒星不現夜明如日卽佛生時之瑞應也良由佛有真應二身權實兩智三明八解五眼六通神用不可思議法號心行處滅

其道也運衆聖於泥洹其力也接下凡於苦海巍巍
蕩蕩可略言焉故列子云昔吳太宰嚭問孔丘曰夫
子聖人歟孔子對曰丘博識強記非聖人也又問三
王聖人歟對曰三王善用智勇聖非丘所知又問五
帝聖人歟對曰五帝善用仁信聖亦非丘所知又問
三皇聖人歟對曰三皇善用時聖亦非丘所知太宰
大駭曰然則孰爲聖人乎夫子動容有間曰西方之
人有聖者焉不治而不亂不言而自信不化而自行
蕩蕩乎民無能名焉若將三皇五帝必是大聖孔丘
豈容隱而不說便有匿聖之譽以此校量推佛爲大
聖也又老子西升經云吾師化遊天竺善入泥洹量
此而言優劣可知也

前漢孝武帝元狩中霍去病討匈奴至臯蘭過居延
山獲昆邪休屠王等又獲金人率長丈餘之到於甘
泉宮帝以爲大聖燒香禮拜及開西域遣張騫使大
夏還云有身毒國一名天竺始聞浮圖之教此卽佛
之形教相顯之漸也

前漢哀帝元壽年使景憲往大月氏國因誦浮圖經
還漢當時稍行浮圖齋戒也
前漢成帝時都水使者光祿大夫劉向傳云向博觀

史籍往見有佛經及看列仙傳云吾搜檢藏書太史
創撰列仙圖黃帝以下迄至于今定檢實錄一百四
十六人其七十四人已見佛經矣據此而明秦周已
前早有佛法流行震旦何以取知今案所列也故佛
傳云佛滅度後一百一十六年東天竺國有鐵輪王
統閻浮提收佛靈骨役使鬼神起八萬四千塔具如
下述此九州之地並有遺塔云是育王所造此塔卽
當此周敬王二十六年丁未之歲故塔興焉世經十
二王至秦始皇二十四年焚燒典籍育王諸塔由此
見隱又檢釋道安朱士行等經錄目云秦始皇之時
有外國沙門釋利防等一十八賢者賫持佛經來化
始皇弗從遂囚禁之夜有金剛丈六來破獄出之始
皇驚怖稽首謝焉准此而言則知秦漢已前有佛法
也尋道安所載十二賢者亦在七十之數今列仙傳
見有七十二人案文殊般若經泥洹經云佛滅度後
四百五十年文殊至雪山中爲仙人說法又案地理
志西域傳云雪山者卽葱嶺是也其下有三十六國
先來奉漢其葱嶺連亘東至終南文殊來化仙人卽
斯地也詳而驗之劉向所論可證矣

後漢郊祀志曰佛者漢言寬也將以覺悟群生也統

其教以修善清心爲主不殺生類專務清淨其精進者名爲沙門漢言息惡剃髮毀容去家出俗絕情洗欲而歸於無爲也又以人死精神不滅隨後受形而行善惡後生皆有報應所貴行善修道以練其神而不已以至無生而得佛也身長丈六黃金色項佩日月光變化無常無所不入故能通萬物而大濟群生有經書數千卷以虛無爲宗包羅精麤無所不統善爲宏闊勝大之言可求在於一體之內所明在於視聽之表歸於玄微深遠難測故王公大人觀生死報應之際莫不懔然自失也餘如漢法本內傳說

後漢明帝時雒陽白馬寺有攝摩騰本中天竺人善風儀解大小乘經常遊化爲任至漢永平三年中明皇帝夜夢金人飛空而至乃大集群臣以占所夢通人傅毅奉答臣聞西域有神其名曰佛陛下所夢將必是乎帝以爲然卽遣中郎蔡愔博士弟子秦景等使往天竺尋訪佛法愔等於彼遇見摩騰乃邀還漢地騰誓志弘通不憚疲苦冒涉流沙至乎雒邑明帝甚加賞接於城西門外別立精舍以處之漢地有沙門之始也又漢明帝遠召摩騰法師來至雒陽於城西雍門外立白馬寺是漢地伽藍之始也相傳云外

國國王嘗毀破諸寺唯招提寺未及毀壞夜有一白馬遶塔悲鳴卽以告王王卽停壞諸寺因改招提以爲白馬故諸寺立名多取則焉又漢雒陽白馬寺有竺法蘭是中天竺人自言誦經論數萬章爲天竺學者之師時蔡愔旣至彼國蘭與摩騰共契遊化遂相隨而來會彼學徒留礙蘭乃間行而至旣達雒陽與騰同止少時便善漢言愔於西域獲經卽爲翻譯所謂十地斷結佛本行四十二章經等五部移都寇亂四部失本不傳江左唯四十二章經今見在可二千餘言漢地見存於此漢地諸經之始也蘭後卒於雒陽春秋六十餘矣又漢明帝時天竺國竺法師將畫釋迦倚像是優填王栴檀像師第四作也旣至雒陽明帝卽令畫工圖寫置清涼臺中及顯節陵王上舊像今不復存焉漢地之始此像初也

魏書亦明漢明帝時三寶初來

之義

昔漢武帝穿昆明池底得黑灰以問東方朔朔云不經可問西域胡僧後法蘭旣至衆人追以問之蘭云世界終盡劫火洞燒此灰是也朔言有徵信者甚衆

昔維衛及迦葉石像以西晉愍帝建興元年像汎海而入乎吳松江滬瀆口遙見海中有二人浮游水上

漁人莫能就視延巫師祝則謂爲海神祭酒則疑是仙靈或振鐸以請或巾褐往祈並濤涌霧暄逆流遠去奉黃老者謂是天師往迎風浪如故吳縣朱應素奉正法廼請東靈寺帛尼并信齋戒者數人共往迎像於是雲銷日朗風霽波息乘流自到轉身示銘始接登舟其輕如羽未載大車其重若山及處像於吳時舊寺通玄精舍事源委曲已詳舊碑至齊永明七年又有瑞石浮海來入吳境質堅貞固光采鮮潤駕潮截瀾汎若松舟時主書朱法讓卽先獲石像朱應之曾孫也被使至吳獲石像獻臺是時齊武皇帝初建禪靈重構七層壯美莊嚴而瑞像不遠而至協時應機朝士僉議以爲宜矜妙貺式影法身乃命石匠雷卑石等造釋迦文像身坐高三尺五寸連光及座通高六尺五寸盡鑄琢之奇極金釀之巧克孚頭相元副幽禎竊惟石性本沉神感則浮越海適吳隲代荐至雖古今異造而總歸七佛獲瑞之人復緣朱氏祕契冥期終始如一故追序前事以表厥證宋世所獲二石像立高七尺銘其背上一名維衛佛二名迦葉佛莫識年代而字分明在吳郡通玄寺齊威所造瑞石像舊在禪靈寺

齊文宣皇帝時有先師統上家世涼州年至十三發誓西行至宋元徽三年五月遂發京師到五年方到芮芮進到于闐國臨發之日有一僧於密室之中出銅函一枚手授先師曰此函有佛牙方一寸長三寸可將還南方廣作利益先師歡喜頂受如覩佛身此僧又云我於烏纏國取此佛牙甚爲艱難又獲銅印一枚國王面像以封此函先師後聞諸僧共議云烏纏國失却佛牙不知何國福德僧當獲供養先師聞已私懷默喜倍加尊敬於是賫還鍾山十有五載雖復親近而弟子莫知唯密呈靈相寺法穎律師頂戴苦勤出示舊聞龜茲一僧莫知真僞心多疑僞是時司徒竟陵王文宣王幼舍勝慧結志隆雲誠感懇徵亟發靈應以永明七年二月八日於西第在內堂法會見佛從東來威容顯曜文宣望身頂禮因而侍立自覺已冠裁及趺蹠佛俛而微笑旣而咳唾白如凝雪以手承捧變爲玉稻後移鎮東府以六月二十九日又夢往定林見先師稱病而卧因問生老病死五通未免法師衣鉢之餘寧可營功德不對曰貧道庫中有無價神寶敬以憑託宜自取之依言往求見有函匱次第開視多是經像末見小函懸在虛空取而

開之光色不恒始言是像而復非像既云非像而復是像文宣從夢而覺心知休徵明旦卽遣左右楊曇明密夢證法師庫中必有異寶宜以惠示先師造次之間謂求俗真珠不意是牙乃修常答旨續更尋思中夜方悟以事難傳說乃躬自到府具敘本源貧道唯示穎律師一人更無知者今檀越感通冥應信而有徵便是不可思議其迹已現寧敢久辱威神以廢佛事今奉歸供養後經三日自送東府文宣得牙十許日又夢在空中狀若牛角長三尺餘神光洞發燭其右臂俄覩一蠟像亦三尺瞬目而語三稱極佳先師又於于闐得舍利十五枚處處分布枳園禪靈起剎之時悉皆得分以一枚送與文宣文宣時東宮卽取淨水試其真僞浮在鉢中俄頃不見道俗數十精心檢覓求不能得內外周迴莫不疲惫文宣方竭誠懺俄爾之間復於向處忽見在地光高尺餘色彩炳曜衆咸共覩莫不讚美先師所餘二枚各一銀函封題府篋後更檢視與函俱失垂三載後開取佛牙忽於本篋還復得之先有二枚而長獲一甕成三枚同在一處但先銀函猶遂失焉故神化不可測度矣文宣素聞西方有佛牙髮喜躍特深到建元三年啓高

皇帝遣外國沙門曇摩多羅索供養之具以申虔仰
又造小形寶帳擬送西域既而逗留如有所得俄而
先師屆都果獲靈瑞卽此寶帳廻以供養冥理相契
非一朝焉文宣後造寶臺以盛帳製寶藏以貯函敬
事尊重頃歷心力矣

右前諸事出漢法內傳并雜史高僧傳等錄

隋國師智者天台山國清寺釋智顛俗姓陳氏潁川
人也宿德英賢自古罕儔常樂山居靜慮習禪道俗
欽敬君臣識重顛初往天台先有青州僧定光久居
此山積三十載定慧兼習蓋神人也既達彼山與光
相見卽陳賞要光曰大善知識憶吾早年山上搖手
相喚不乎顛驚異焉知通夢之有在也時以陳太建
七年秋九月矣又聞鐘聲滿谷衆咸怪異光曰鐘是
召集有緣爾時住也顛乃卜居勝地是光所住之北
佛壟山南螺溪之源處旣閑敞易得尋真地平泉清
徘徊止宿俄見三人皂幘絳衣執疏請云可於此行
道於是創建草菴樹以松果數年之間造展相從復
成衢會光曰且隨宜安堵至國清時三方總一當有
貴人爲禪師立寺堂宇滿山矣時莫測其言也顛後
於寺北華頂峯獨淨頭陀大風拔木雷霆震吼螭魅
千群一形百狀吐火聲呌駭畏難陳乃抑心安忍湛

然自失又患身心煩痛如彼火燒又見亾沒二親枕
顛膝上陳苦求哀顛依止法忍不動如山故使強軟
兩緣所感便滅忽致西域神僧告曰制敵勝怨乃可
爲勇文多不載陳宣帝下詔曰禪師佛法雄傑時匠
所宗訓兼道俗國之望也宜割始豐縣調以充衆費
蠲兩戶民用供薪水天台山縣名爲安樂令陳郡袁
子雄崇信正法每夏常講淨名忽見三道寶階從空
而降有數十梵僧乘階而下入堂禮拜手擎香鑪遶
顛三匝久之乃滅及大衆同見驚歎山喧其行達靈
感咸皆如此不可具述於開皇十七年十一月二十
二日忽語衆吾將去矣言已端坐如定而卒於天台
山大石像前春秋六十有七至於滅後而多靈驗到
仁壽末年已前忽振錫被衣猶如平昔凡經七現重
降山寺一還佛壟語弟子曰案行故業各安隱耶舉
衆皆見伸敬言問良久而隱

唐潞州法住寺釋曇榮俗姓張氏定州人也神厲氣
清觀榮勤攝隨緣通化曾無執著每年春夏立方等
般舟至於秋冬各興禪誦乃告衆曰舍利之德挺變
無方若苦業有銷請祈可遂乃人人前別置水鉢加
以香鑪通夜苦求至明鉢內總獲舍利四百餘粒後

時所住堂舍忽自崩壞龕像舍利宛然挺出布在庭中一無所損又至貞觀七年清信士常疑保等請榮於州治法住寺行方等懺法至七月十四日有本寺沙門僧定者戒行精固於道場內見大光明五色間起從上而下中有七佛相好非常語僧定云我是毗婆尸如來無所著至真等正覺以汝罪銷故來爲證然非本師不與受記如是六佛皆同此詞最後一佛云我是汝本師釋迦牟尼也爲汝罪銷故來授記曇榮是汝滅罪良緣於賢劫中名普寧佛汝身器清淨後當作佛名爲普明若斯之應現感靈祥信難圖矣以貞觀十三年卒於法住寺春秋八十有五

右二人出唐高

僧傳

敬佛篇第六之一

述意部

夫至人應感慈赴物機色相光明振德於甘露之澤影留圖像遣化於日隱之運所以忉利暫隔猶致刻檀之聖容況堅固長晦孰忘疇寫之心哉是故發源西國則優填創其始移教東域則漢明肇其初沿茲而來匠者踵武聿追法身備極珍寶金石珠玉之飾土木繡畫之資莫不卽心致巧因茲呈妙昔晉代僧

衆創造緯絕宋齊帝王製作曰新多未記銘懼或失源今錄其殊勝垂範表益也

念佛部

夫大聖有平等之相弟子有稱揚之德故十方諸佛同出於淤泥之濁三身正覺俱坐於蓮臺之上隨念何相皆得利益所謂始從出家終成正覺於其中間道樹降魔鹿野說法相好圓滿光明炳著身色清淨事等鎔金面貌端嚴猶如滿月齒同珂雪髮似光螺目譬青蓮眉方翠柳八音響亮萬相雍容五眼洞明六通遙颺懸河寫辯連注投機圓三點以成身具五分而爲體帶權實以度物隨真應以化人或扇廣大之慈風灑滂沱之法雨能使身田被潤卽吐無上之芽心樹旣榮便茂不彫之葉不來相而來不見相而見爲衆生故隨緣應現十方十億並願歷侍三千大千俱得親承長種福田廣興供養吐邪倒之根拔貪嗔之本修念佛之因證見佛之果故法華經偈云
若人散亂心 入於塔廟中 一稱南無佛 皆已成佛道

又譬喻經云昔有國王煞父自立有阿羅漢知此國王不久命終計其餘命不過七日若命終後必墮阿

鼻地獄一劫受苦此阿羅漢尋往化之勸教至心稱
南無佛七日莫絕臨去重告慎莫忘此王便叉手一
心稱說晝夜不廢至于七日便即命終魂神趣向阿
鼻地獄乘前念佛至地獄門知是地獄即便大聲稱
南無佛獄中罪人聞稱佛聲皆共一時稱南無佛地
獄猛火即時化滅一切罪人皆得解脫出生人中後
阿羅漢重爲說法得須陀洹以是因緣稱佛名號所
獲功德無量無邊不可爲喻又觀佛三昧經云昔佛
在世時佛爲父王及諸大衆說觀佛三昧經佛有三
十二相八十種好身真金色光明無量時座下有五
百釋子以罪障故見佛色身猶如灰色羸婆羅門見
已號哭自拔頭髮舉身投地鼻中血出佛安慰曰汝
勿號哭吾爲汝說過去有佛名毗婆尸入涅槃後於
像法中有一長者名日月德有五百弟子聰明多智
無不貫練其父長者信敬三寶常爲諸子說佛法義
諸子邪見都無信心後時諸子同遇重病父到兒前
泣淚合掌語諸子言汝等邪見不信佛法今無常刀
切割汝身爲何所怙有佛世尊名毗婆尸汝可稱名
諸子聞已敬父言故稱南無佛復教稱法及稱僧名
稱已命終由稱佛故生四天王天天上壽盡以前邪

見還墮地獄獄卒羅刹以熱鐵叉刺壞其眼受是苦
時憶父教稱念佛因緣從地獄出來生人中貧窮下
賤後式佛出亦得值遇但聞佛名不覩佛形後隨葉
佛拘樓秦佛拘那含佛迦葉佛亦皆聞名不見其形
以聞如是六佛名故今得與我同生釋種我身端嚴
如閻浮金汝見灰色羸婆羅門皆由前世邪見故爾
汝今可稱過去佛名并稱汝父亦稱我名及彌勒佛
稱已作禮及向大衆大德衆僧五體投地發露懺悔
邪見之罪請人受教懺悔訖已見佛金色如須彌山
見已白佛我今見佛三十二相八十種好無量光明

作是語已得須陀洹求佛出家得阿羅漢三明六通
具八解脫佛告比丘我滅度後若稱我名南無諸佛
所獲福德無量無邊又觀佛三昧經云昔過去久遠
有佛出世號釋迦牟尼滅度之後有一王子名曰金
幢憍慢邪見不信佛法有一比丘名定自在語王子
言世有佛像衆寶嚴飾極爲可愛可暫入塔觀佛形
像王子卽隨共入塔中見像相好白比丘言佛像端
嚴猶尚如此況佛真身比丘告言汝今見像不能禮
者應當合掌稱南無佛是時王子卽便合掌稱南無
佛還宮繫念塔中像故卽於後夜夢見佛像夢已歡

喜捨離邪見歸依三寶由一入塔稱佛善根命終得
值九百萬億那由他佛於諸佛所逮得甚深念佛三
昧得三昧故諸佛現前為其授記從是已來經於百
萬阿僧祇劫不墮惡道乃至今日獲得甚深首楞嚴
定昔王子者今財首菩薩是以是因緣智者應當如
是學念佛也

法苑珠林卷第二十

校譌

第二紙

十五行拂北藏作佛

第十六紙

十四行真宋南藏作珍

音釋

汎

孚梵切浮也

鑄

遵全切刻也

驛

戶華切

驕

力求切

詬

普鄙切人名

讐

丘虔切與愆同

據

其據切懼也

殺

疑既切

滄

音戶瀆水名

艘

屋郭切善丹也

芮

儒稅切國名

蹠

胡瓦切足骨也

壘

魯勇切

常熟居士嚴濟施貲刻此法苑珠林第二十卷

吳江比丘明覺對

廬陵彭國禎刻

唐士登書 萬曆辛卯夏清涼山妙德庵識

甌寧

經

